

YOSUA

Zìblena Kanaa b̀usua 1:1-11:23

Yosua l̀ezammana k̀ɔn à ganao 23:1-24:33

Dii yãdiɛna Yosuanɛ

¹ Dii z̀ɔbleri Musa gaa gbera Dii yã ò Musa kpàasi Yosua, Nuni néne à bè: ² Ma z̀ɔbleri Musa gà. Ñ fɛɛ ò bikũ Yodaa k̀ɛ sa, mpi k̀ɔn Isarailinɔ ò píngi, à gɛ̀ b̀usu k̀ɛ má kpàawaan. ³ Guu k̀ɛ a gbá p̀ɛɛn píngi, má kpàawa lán má ò Musanɛ nàmɛ. ⁴ Sena zaa gbáan ai gana Lebanɔ b̀usun, sena zaa swa bíta k̀ɛ wè be Yuflati ai gana ísíaa k̀ɛ kú ɔfántɛgɛ̀kpen kpa, Itinɔ b̀usu p̀i é gɔ à b̀usu ũ píngimɛ. ⁵ Ai ò gá gao gbɛ̀ke é e à n g̀sã f̀iɔ. Lán má kú k̀ɔn Musao nà, len mégɔ kúnɔyo lɛ. Mé n tónlo, mé pã kpánzi zikiro.

⁶ Ñ zɛ gbãa ògɔ wórɔngɔ v̄i, zaake m̀be né b̀usu k̀ɛ ma à lé gbɛ̀ a dezi káakunɔne ma bè mé kpámma sí ò kpá gbɛ̀ k̀ɛnɔa. ⁷ Ñ zɛ gbãa ògɔ wórɔngɔ v̄i dé! Ñ làakari dɔ doka k̀ɛ ma z̀ɔbleri Musa d̀annɛɛa ògɔ k̀una píngi. Ñton k̀ɛa ò na ɔplazi ke ɔzɛziro, n tá égae kɛ nna. ⁸ Ñ tó Musa doka takada p̀i yã gɔ da n lén, ògɔ laasuu lɛɛa fáantɛ k̀ɔn gwãav̄iɔ. Ñ làakari dɔ yã k̀ɛ kú à guunɔa píngi ò z̄i kɛa, n tá égɔ nna n yã égae bɔ maa. ⁹ Mámbe ma yã diɛnneroo? Ñ zɛ gbãa ògɔ wórɔngɔ v̄i. Ñton tó v̄ia n k̀uro. Ñton bídi kero, zaake mamɔma Dii n Luda, mégɔ kúnɔyo guu k̀ɛ néɛ gaan píngi.

¹⁰ Ben Yosua bè Isaraili d̀ɔn'aɛdeenɔne: ¹¹ À g̀tɛ̀ b̀uran à o gbɛ̀nɔne aɔ k̀sãɛ soru kɛ, zaake gurɔ

aagɔɔ gbera aɔ́é bikū Yodaa kè, aɔ́é gá b̀usu kè Dii n̄ Ludaa kpàńma wàgɔ vī sí. ¹² Yosua bè Rubeninɔne kɔn Gadanɔ kɔn Manasenɔ kpadoo: ¹³ À dɔ yā kè Dii z̀bleri Musa diɛaree kèkiin, à bè Dii a Luda é tó à kámmabokii e à b̀usu kèkii kpàawa. ¹⁴ Beee yānzi a nɔgbēnɔ kɔn a né fétenɔ kɔn a pókādeenɔ gɔ b̀usu kè Musa kpàawaan Yoda baa kè kpa, a z̀ikpɛɛnɔ dɔ n̄ gbēnɔne aɛ wà bikū n̄ píngi, aɔgɔ n̄ gɔ́keboɔnɔ kūna aɔ dɔńlɛ ¹⁵ ai Dii gɔ tó a gbēnɔ kámmabokii e lán à kèare nà, aɔpinɔ sɔ égɔ b̀usu kè Dii a Ludaa e kpańma vī. Beee gbera é su b̀usu kè gɔ́ a pó ũu kè guu, é v̄ɛɛ b̀usu kè Dii z̀bleri Musa kpàawa Yoda baa kè ɔfántɛboɛ kpa pìn. ¹⁶ Ben aɔ wèàla wà bè: Yā kè n̄ diɛwe píngi wé kɛ. Guu kè n wa z̀in píngi wé gámɛ. ¹⁷ Lán wa z̀i kè Musa yāa nà píngi, len wé z̀i kɛ n yāa lɛ se. Dii n Luda gɔ kúnyo, lán à kú kɔn Musao nà. ¹⁸ Gbē kè b̀ò n yā kpɛɛ à gí yā kè n̄ diɛnɛ kezi, adee gámɛ. N̄ zɛ gbāa n̄gɔ wórɔngɔ vī dé!

2

Gu'asiigwarinɔ z̄ina Yeriko

¹ Zaa Sitimu Nuni né Yosua gu'asiigwarinɔ z̀i gɔɔn plaa asii guu à bè: À gá à wéɛ kpáɛ b̀usu pìzi, atēnsa Yeriko. Ben aɔ gāa gwe, aɔ gāa wà pita kaarua kè wè sísi Rahabu bɛɛn. ² Ben wà bè Yeriko kínane: Isaraili kenɔ gɛ́ kè uusíɛa lɛ wà wa b̀usu asii gwa. ³ Ben kína pì gbēnɔ z̀i Rahabua aɔ bè: N̄ bɔ kɔn gɔgbē kè aɔ mò n kiianɔ, zaake wa b̀usu píngi asii gwana yānzin aɔ m̀zi. ⁴ Àɛ sɔ nɔgbē pì gīake à gɔɔn plaaa pìnɔ ùtɛ k̀, ben à bè: Gbē pìnɔ mò ma kiia kè yāpura. Má dɔ guu kè aɔ b̀onlo. ⁵ Kè guu s̀i

bīizetatagurɔ, aɔ bɔɛ. Má dɔ́ tó mákpan aɔ t̀̀nlo. À ń gbè sé kpakpaa, é ń le. ⁶ Àɛ sɔ́ à gĩake à ń sé à gàańyo kpé musu à ń úte gbɔ̀ lí kè kaena gween k̀. ⁷ Z̄irino p̀èéńzi zén ai Yoda bikũkiia, ben wà bīize t̀̀ta ń kpɛɛ ḡɔ.

⁸ Ai gu'asiigwari p̀ino ḡɔ daɛ, Rahabu d̀idi ń kiia kpé musu ⁹ à bèńne: Má dɔ́ kè Dii b̀usu kè kpàawa. A v̄ia wa kũ, ben b̀usu kè deeno k̄a gà ń píngi a ȳanzi. ¹⁰ Wa mà lán Dii Isia T̄ɛaa z̀òk̄ɔɛare nà gurɔ̀ kè a bɔɛ Iyipiti k̄on ȳa kè á kè Siɔ k̄on Oguone, a Am̄rino k̄ina ḡɔon plaaa p̀ino kè dúgudugu Yoda baa k̄aa kpa. ¹¹ Kè wá mà, swè k̀ewagu, wa ninii dà batan a ȳanzi, zaake Dii a Ludan musu k̄on t̀ɔt̄eo Luda ũ. ¹² Zaake ma gb̄ekeɛ k̀eare, apino s̄ɔ́ à síme sa k̄on Dii t̀o kè é gb̄ekeɛ ke ma de b̄edeenoɛ. À s̀eda kemɛ le màḡɔ d̄ɔ s̄ans̄an ¹³ kè é ma de k̄on ma dao k̄on ma v̄ino k̄on ma d̄aronɔ k̄on wa gb̄eno mì sí ń píngi à wa bɔ gaa lézĩ. ¹⁴ Ben ḡɔgb̄e p̀ino wè̀ala wà bè: M̄be wa w̄endi ũ, wámbe n w̄endi ũ se. Tó n̄é wa ȳa o gb̄ekeɛ màro, tó Dii b̀usu kè kpàwa, wé gb̄ekeɛ kenne ȳapura.

¹⁵ Ben à ń b́ɛ windo guu à ń p̄ita b̄ii kpɛɛ k̄on bào, zaake à b̄eɛ kè à k̄un kú wéte b̄ii musume. ¹⁶ À bèńne: À mì pé k̄piinoɔ le a gb̄eserinɔ tón dak̄ɔɛaoro ȳanzi. Àḡɔ utena gwe gurɔ̀ aaḡɔ ai a gb̄eserinɔ su, é gbasa à da zén. ¹⁷⁻¹⁸ Ben ḡɔgb̄e p̀ino bène: Tó wa ɛara wa ḡɛ a b̀usun, n̄ w̄ɔ t̄ɛaa k̀ekii dɔ windo kè n̄é wa b̄oen k̀ea, n̄ n de k̄on n dao k̄on n v̄ino k̄on n d̄aronɔ k̄on n de b̄edeeno kak̄anzi ń píngi n kpé k̀ekiin. Tó n̄é ke lero, wa bà éḡɔ kú ladana kè ń t̀ò wá la d̄anneɛn d̄oro. ¹⁹ Tó aɔ gb̄eke

bò n kpén à gàa gāale, à a zīnda dèn gwe, wa yān dɔro. Tó aǎ gbēkee kúnyo kpén, ben wà à dè, wámbe à gana yā é wí wa musu. ²⁰ Tó n wa kómɔtɔ kè gbēnɔne sɔ, wa bà égɔ kú ladana kè n tò wá la dānne pìn dɔro. ²¹ Ben Rahabu bè: Àgɔ de lán á ò nà. Ben à n gbáe aǎ tà. Ben à wɔɔ tēaa pì dɔ a windoa.

²² Kè aǎ pìta bīia le, aǎ mì pè kpīiinɔ, ben aǎ ì gwe gurɔ aagɔ ai n gbèserinɔ gāa sùo. Aǎ gbèseri pìnɔ n wéte zé sae pínɡi aǎe n ero. ²³ Ben gɔɔn plaaa pìnɔ dà zén aǎ pìta kpīii pìnɔ aǎ bikù swaaa. Kè aǎ kà Nuni né Yosua kiia, aǎ yā kè à n lé gbàne pínɡi ²⁴ wà bè: Dii bùsu pì nàwe wa ɔzī pínɡi. Bùsu pì deenɔ ká gà n pínɡi wa yānzi.

3

Isarailinɔ bikana Yodaa

¹ Yosua fēe kɔngɔ idé'idé kɔn Isarailinɔ n pínɡi. Bɔna Sitimu aǎ gāa Yodazi, ben aǎ bùra kàe gwe ai aǎgɔ gá bikū. ² Gurɔ aagɔɔ gbɛra Isaraili dɔn'aedeennɔ dɔdɔ bùrazi ³ aǎ yā diè gbēnɔne wà bè: Tó á è Levi bori sa'orinɔ Dii a Luda bà kuunawao àkpati sena, à da zén àgɔ té n kpɛɛ, ⁴ le à e à dɔ zé kè é sé, zaake ée zé pì sé zikiro. Àgɔ té zàazā lán kiloo do taka bàɔɔ! Àton sɔ àkpati pìziro. ⁵ Ben Yosua bè gbēnɔne: À gbāsī bɔ a zīndan, zaake Dii é yābɔnsae ke a té zia. ⁶ Ben à èara à bè sa'orinɔne: À Dii bà kuunawao àkpati sé à dɔ gbēnɔne aè à bikūo. Ben aǎ àkpati pì sè wà dɔo gbēnɔne aè.

⁷ Dii bè Yosuanɛ: Mé na n sena lezīa Isarailinɔne gbāa, aǎégɔ dɔ kè má kúnyo lán má kú kɔn Musao nà. ⁸ N o sa'ori kè aǎ ma bà kuunaao àkpati senanɔne, tó aǎ kà Yodazi, aǎ gē wà ze à ín. ⁹ Ben

Yosua bè Isarailinɔnɛ: À mó kè à Dii a Luda yā ma. ¹⁰ Ben à èara à bè: Len éǵō dō kè Luda Wèndidee kúao le, bensō eé péare Kanaanɔa kōn Itinɔ kōn Ivinɔ kōn Perizinɔ kōn Gigasinɔ kōn Amorinɔ kōn Yebusinɔ. ¹¹ À gwa! Anduna pínɡi Dii bà kuu-nawao àkpati é dɔare aε ai Yoda ín. ¹² À ǵōn kuri awεεplaaanɔ sé a té, bori kōn boriio gbě mèn doodo. ¹³ Tó sa'ori kè aō anduna pínɡi Dii àkpati senanɔ gbá pèe Yoda ín, í pì é zǵkǵre, í kè èe bɔɔ swaa musu é bīi ke à ǵō zena a gbèn.

¹⁴ Kè gběno bùra fèe wà dà zén, aōe gaa bikū Yodaa, sa'ori kè aō Dii bà kuunaño àkpati senanɔ té n aε le. ¹⁵ Pókekeguro pínɡi swaa pì é pa ai à dà sīsīla, mɔde gurɔ kè àkpatiseri pìnɔ kà swaa pizi, kè aō gbá pèe ín, ¹⁶ ben í kè èe bɔɔ swaa pì musu zǵkǵre à bīi kè à ǵō zena a gbèn zaa zàazā wéte kè wè be Adamu saε Zaretā bùsun. Í kè èe taa sèbe wisideen zǵkǵre míomio, ben gběno bikū aedkōana kōn Yerikoo. ¹⁷ Sa'ori kè aō Dii bà kuunaño àkpati senanɔ ǵō zena Yoda wèen tɔɔte koria ǵínɡin, ben Isaraili bori pínɡi té gukori pìn ai aō gàa wà bikū n pínɡi wà yāa.

4

Gbè mèn kuri awεεplaaanɔ didikōana sèeda ũ

¹ Kè Isaraili bori pínɡi bikū Yodaa wà yāa, ben Dii bè Yosuanɛ: ² A bori mèn kuri awεεplaaanɔ té à gběno sèn doodo ³ n oñne aō gbè séε swaween mèn kuri awεεplaa guu kè sa'orinɔ zén súusu, aō bikūo wà káε guu kè é in gwāavīa. ⁴ Ben Yosua ǵōn kuri awεεplaaanɔ diε Isaraili boriinɔ té doodo, ben à n

sísi ⁵ à bènnε: À gá Yoda wèen Dii a Luda àkpati aε, a baade gbè sé à di a gàn a Isaraili boriinɔ pari lén. ⁶ Gbè kèkiinɔ é gɔare sèeda ũ. Tó a nénɔ a la zia, bón gbè kènɔɔ deare à ũ, ⁷ à beñε, kè wèe bikũu kɔn Dii bà kuunawao àkpatio, ben à í zòkɔre, ben gbè pìnɔ gò Isarailinɔne à dɔngu pɔ ũ ai guro pínɡi. ⁸ Len Isarailinɔɔ kè le lán Yosua ònnε nà. Aɔ gbè sèe Yoda wèen mèn kuri awεεplaa Isaraili boriinɔ pari lén lán Dii ò Yosuanε nà. Aɔ bikũo aɔɔ kàe guu kè aɔ in. ⁹ Gbè mèn kuri awεεplaaa kè wà sèe swawεen sa'ori kè aɔ àkpati sena pìnɔ zekiian Yosua didikɔa, aɔɔ kú gwe ai kɔn a gbáaɔ.

¹⁰ Sa'ori kè aɔɔ àkpati pì senanɔ gò zena swawεen ai yá kè Dii diε Yosuanε à ò gbēnɔne gaa à kèo pínɡi lán Musa diεne nà. Gbēnɔ kè kpaa aɔ bikũ. ¹¹ Kè aɔ bikũ n pínɡi wà yáa, gbasa sa'orinɔ bikũ kɔn Dii àkpatio gbēnɔ wáa. ¹² Rubeni bori gɔgbēnɔ kɔn Gada bori gɔgbēnɔ kɔn Manasenɔ kpado gɔgbēnɔ bé wà dè Isaraili bori kpaaanɔne aε wà bikũ lán Musa ònnε yá nà. Aɔ n gòkebonɔ kũna. ¹³ Aɔ zìkpeenɔ kà gɔɔn bɔɔɔ baplaa taka. Aɔ bikũ Dii aε aɔ gaa Yeriko gbáan kɔn zì soruo. ¹⁴ Zì beean Dii Yosua sè lezì Isarailinɔne n pínɡi, ben aɔ à yá mà ai à gaa à gào lán aɔ Musa yá mà nà.

¹⁵ Ben Dii bè Yosuanε: ¹⁶ N̄ o sa'ori kè aɔɔ doka àkpati senanɔne aɔ bɔ swawεen. ¹⁷ Ben Yosua ònnε aɔ bɔ swawεen, ¹⁸ ben aɔ bòn. Kè aɔ gbá pèe s̄s̄ĩa, ben swa'i èara à sù a gbèn gɔɔ. À pà à dàgula ai à dà s̄s̄ĩla lán káakupɔ bà.

¹⁹ Mɔ káaku guro kuridee z̄in Isarailinɔ bɔ Yoda

swawεεν aõ gàa wà bùra kàe Giligala, Yeriko ɔfántēbɔε kpa. ²⁰ Yousua gbè mèn kuri awεεplaaa kè wà sèe Yoda wèen pìnɔ d̀dikõa Giligala gwe. ²¹ À bè gbēnɔne: Tó a nénɔ gà wà n̄ denɔ là zia wà bè, gbè kènɔ yáasi de diamε? ²² À beñne, a bikūna Yodaa gukoria sèedame, ²³ zaake Dii a Luda à í bàbaare a zén, ben a bikù lán a bikù Isia Tēaa kè à à í bàbaareea nà. ²⁴ Dii kè le, le anduna bori p̀ngi gõ dõ kè à gbāa vī, apinɔ s̄õ àgõ Dii a Luda vīa vī guro p̀ngi.

5

¹ Kè Amɔrinɔ kína kè aõ kú Yoda ɔfántēgēkpen kpaanɔ k̄n Kanaanɔ kína kè aõ kú ísīaa saenɔɔ mà lán Dii Yoda í z̄k̄ɔre Isarailinɔne aõ bikù nà, ben swè kèngu aõ kã gà n̄ p̀ngi Isarailinɔ yānzi.

Bàngukena Isarailinɔne Giligala

² Guro beea Dii bè Yɔsuanε: N̄ gbè f̄εenɔ ke n̄ εara n̄ b̄ngu ke Isarailinɔne. ³ Ben Yɔsua bè wà gbè f̄εenɔ ke, ben wà b̄ngu k̄o Isarailinɔne guu kè wè be tia Gefɔɔ S̄is̄i. ⁴ Yā kè tò à b̄ngu k̄énen yè. Isarailinɔ b̄ena Igipiti gbera, aõ tá guu, gõ gbāaa kè aõ b̄ngu k̄enɔ gàga gbáan n̄ p̀ngi. ⁵ Gbē kè aõ b̄de Igipitinɔ b̄ngukena n̄ p̀ngi. Gbē kè wà n̄ í gbáan zé guu b̄ona Igipiti gberaanɔ, aõmbe aõεe b̄ngu kero. ⁶ Isarailinɔɔ té gbáan wè baplaa ai gbē kè aõ de gõ gbāaanɔ ũ gurɔɔ kè aõ b̄de Igipitinɔ gàa wà gàgao n̄ p̀ngi, zaake aõεe Dii yā maro. Dii bèñne aõé wéε si bùsu kè a à lé gbè n̄ dezinɔne à bè é kpám̄malero, bùsu kè zwi k̄n zó'io din p̄i. ⁷ Aõ né kè Dii tò aõ f̄εε n̄ gberaanɔn Yɔsua b̄ngu k̄éne,

zaake gefɔɔdeenɔme, wèe bǎngu kɛ́nne zénlo. ⁸ Kè Isarailinɔ bǎngu kè ní píngi wà yǎa, aɔ gò guu kè aɔ bùra kàen gwe ai ní bò gàa à yǎao. ⁹ Ben Dii bè Yɔsuanɛ: Ma wí kè Igipitinɔɔ dàawaa b̀̀are gbǎan gwe. Ben wà tó kpà guu pinɛ Giligala ai kɔn a gbǎao.

¹⁰ Isarailinɔ bùra kaena Giligala ben aɔ Banla zĩbaa kè Yeriko gbǎan gwe mɔɔ pì gurɔ gɛro do-saidee zĩ uusiɛ. ¹¹ Kè wà zĩbaa pì kè guu d̀̀o aɔ bùsu pì bura pónɔ blè, buredi sése'èzēsainɔ kɔn pówɛɛ kpatanao. ¹² Aɔ bùsu pì bura pónɔ blena gbera, kè guu d̀̀o, manakwɛena zè, èe kwééíne d̀̀ro, ben aɔ Kanaa bùsu blɛɛ blè wè beee sa.

Dii z̀̀ikpɛɛnɔ dɔn'aɛdee

¹³ Kè Yɔsua kà k̄i kɔn Yerikoo, à wéɛ sè à guu gwà, ben à gògbè ke è zena a aɛ kɔn f̀̀ɛdaao na à ɔzĩ. Ben Yɔsua s̀̀zi à à là à bè: Ní kú wa kpɛɛn yó, ke wa ibɛɛnɔ kpɛɛ? ¹⁴ À wèàla à bè: Lenlo. Dii z̀̀ikpɛɛnɔ dɔn'aɛdeen ma ũ, ma kanan yè. Ben Yɔsua kùɛɛ à mì pèɛ, ben à à là à bè: Bón ma Dii é o mamɔma a z̀̀blerinɛ? ¹⁵ Dii z̀̀ikpɛɛnɔ dɔn'aɛdee pì wèàla à bè: Ní n kyatee b̀̀b̀o, zaake guu kè ní zén kú adona. Ben Yɔsua kè le.

6

Yeriko b̄i leena

¹ Wà Yeriko b̄ize gb̀̀nɔ t̀̀ta gíngin Isarailinɔ yǎanzi. Gb̀̀kee e b̀̀ro, gb̀̀kee e gɛro. ² Ben Dii bè Yɔsuanɛ: Ní gwa, ma Yeriko ǹ̀anne n ɔzĩ kɔn à kinao kɔn à z̀̀ikpɛɛnɔ. ³ Mpi kɔn n z̀̀ikpɛɛnɔ à gá liga wéte pìzi g̀̀n do a píngi à su. Àgɔ ligaazi le g̀̀n doodo ai

guro swεedo. ⁴ Sa'ori gɔɔn swεεplaaano do àkpatine ae aɔgɔ kuu kūna. À guro swεεplaaadee zĩ à liga wéte pìzi gènn swεεplaa guro kè sa'ori pìnɔ e n kuu pεε. ⁵ Tó aɔ kuu pè aɔe à bà gaa, ben a à ɔ mà, gbẽ píngi wii lé gbāngbān, wéte bĩi é léε, a baade é sin súusu.

⁶ Ben Nuni né Yousua sa'orino sisi à bènnε: À Dii bà kuunawao àkpati sé, a gɔɔn swεεplaaano é done ae, a baade égɔ kuu kūna. ⁷ Ben à bè gbēnɔnε: À fεε à gá liga wétezi gènn do. Zìkpεεnɔ bé wà do Dii àkpatine ae. ⁸ Kè Yousua yā ò gbēnɔnε, ben sa'ori gɔɔn swεεplaaa kè aɔ kuu kūna pìnɔ fεε wà dò Dii bà kuunaño àkpatine ae, aɔe n kuu pεε. ⁹ Zìkpεεnɔ té sa'ori pìnɔ ae, parii té àkpati kpεε, bensɔ kuunɔ ɔ do. ¹⁰ Yousua gĩake à ò gbēnɔnε à bè: Àton wii léro. Àton tó wà a kii maro. Àton tó yāke bo a lénlo ai guro kè mé oare à wii lé, gbasà à lé. ¹¹ Aɔ gàa wà liga wéte pìzi kɔn àkpatio gènn do le, ben aɔ èara wà tà n bùran aɔ ì gwe.

¹² Yousua fεε kɔngɔ ide'ide, ben sa'orino Dii àkpati sè. ¹³ Sa'ori gɔɔn swεεplaaa kè aɔ kuu kūna pìnɔ dò Dii àkpatine ae, aɔe pεε. Zìkpεεnɔ dònnε ae, parii té àkpati pì kpεε, bensɔ kuunɔ ɔ do. ¹⁴ Aɔ liga wéte pìzi gènn do à guro plaadee zĩ, ben aɔ èara wà tà n bùran. Aɔ kè le ai guro swεedo. ¹⁵ À guro swεεplaaadee zĩ aɔ fεε ide'ide gudɔnao, ben aɔ èara wà gàa wà liga wéte pìzi lán aɔè ke nà. Mɔde zĩ beee aɔ ligazi gènn swεεplaame. ¹⁶ À gènn swεεplaaadee pì guro kè sa'orino e gaa n kuu pé gbāngbān, ben Yousua bè gbēnɔnε: À wii lé, zaake Dii wéte pì kpàawame. ¹⁷ Dii wéte pì kɔn pɔ kè kúnno diε a pɔ ũ. Wà n kaate n píngi. Kaarua Rahabu kɔn gbẽ kè aɔ kúo à bεεnɔ

bé wé bɔ́ òtḗḗ, zaake àmbe à gu'asiigwari kè wà ñ zĩnɔ́ ùtḗ. ¹⁸ À làakari ke! Àton pɔ́ kè Dii tḗ ke séro, lḗ àton kaatero yánzi. Tó á sè, é yá gáe a bùrane à gṵ kaatena pɔ́ ũ. ¹⁹ Kondogi kɔ́n vurao kɔ́n m̀gotḗ pɔ́nɔ́ kɔ́n m̀si pɔ́nɔ́ ṕngi né Dii pómḗ. Séde wà ká Dii auziki utekiin.

²⁰ Kè wà kuu pè bensɔ́ Isarailinɔ́ wii lè gbāngbān lḗ, wḗtḗ bīnɔ́ lèḗ. Ben aṵ baade sìn súusu, ben aṵ wḗtḗ pì sì. ²¹ Aṵ pɔ́ kè kúnɔ́nɔ́ diḗ Dii pɔ́ ũ, ben aṵ gbḗnɔ́ kàate ñ ṕngi kɔ́n fḗḗdaao, gṵgbḗnɔ́ kɔ́n nɔ́gbḗnɔ́, né fétenɔ́ gbḗnsinɔ́ kɔ́n zùnɔ́ kɔ́n sāanɔ́ kɔ́n zaakinɔ́.

²² Yosua bè gṵɔ́n plaaa kè aṵ gáa wà bùsu pì asii gwànonḗ: À gḗ kaarua pì bḗen à bɔ́o kɔ́n a gbḗnɔ́, lán a à lḗ gbḗnḗ nà. ²³ Ben gṵkparḗ pìnɔ́ gáa wà b̀ kɔ́n Rahabuo kɔ́n a deo kɔ́n a dao kɔ́n a v̄inɔ́ kɔ́n a dāaronɔ́ kɔ́n a gbḗnɔ́ ñ ṕngi. Aṵ sùo kɔ́n à danenɔ́ ñ ṕngi, ben aṵ ñ káe Isarailinɔ́ bùra sae. ²⁴ Ben aṵ tḗ sṵ wḗtḗ pia kɔ́n pɔ́ kè kúnɔ́nɔ́ ṕngi, tó èḗ ke kondogi kɔ́n vurao kɔ́n m̀gotḗ pɔ́nɔ́ kɔ́n m̀si pɔ́ kè aṵ sèḗ wà kàe Dii bisakuta auziki utekiin baasiro. ²⁵ Yosua tò kaarua Rahabu b̀ aafia kɔ́n à de bḗdeenɔ́ kɔ́n à gbḗnɔ́ ñ ṕngi, kè à gu'asiigwari kè Yosua ñ zĩ Yḗriko asii gwaanɔ́ ùtḗ yánzi, ben aṵ gṵ Isarailinɔ́ tḗ ai kɔ́n a gbàao. ²⁶ Gurɔ́ beeeea Yosua lḗ kè à b̀: Dii láari ke gbḗ kè eé fḗḗ à Yḗriko wḗtḗ kè keke à káea.

Tó à à bīi ḗḗ kpàḗ, à daudu é ga.

Tó à à gbànó pèḗ sṵ, à né zāadee é ga.

²⁷ Dii kú kɔ́n Yosua, ben à tó dà bùsu pìla ṕngi.

7

Aká durun yá

1 Isarailinɔ tɛ̀ pɔ̀ kɛ̀. Kaami nɛ̀ Akā, Zimiri dio, Zera swākpee, Yuda borii bé à tɛ̀ pɔ̀ kenɔ̀ sɛ̀, ben Dii pɔ̀ fɛ̀ Isarailinɔ̀zi.

2 Yosua gbɛ̀nɔ̀ zɪ̀ à bè, aɔ̀ bɔ̀ Yeriko wà gá Ai kè kú Betavɛ̀ sae Beteli ɔ̀fántɛ̀bɔ̀e kpa lɛ̀ wà bùsu pì asii gwa. Ben aɔ̀ gàa wà Ai asii gwà. 3 Kè aɔ̀ sù Yosua kiia, aɔ̀ bènɛ̀: Aideenɔ̀ pariro, èe ká wà gá gwe wa píngiro. Tó gɔ̀n wàa kuri ke wàa gɛ̀roo gàa, aɔ̀é wéte pì sí. Nton ïa da gbɛ̀nɔ̀a ń píngiro. 4 Kè gɔ̀n wàa gɛ̀roonɔ̀ gàa gwe, ben Aideenɔ̀ ń fú 5 aɔ̀ pɛ̀mma bɔ̀na zaa ń wéte bɪ̀ilea ai gbèwikiia, aɔ̀ ń déde s̀s̀igeezi gɔ̀n baaakuri awɛ̀swɛ̀edo. Ben swè kè Isarailinɔ̀n aɔ̀ ninii dà batan.

6 Yosua a uta gà à kè à dàe a puua Dii àkpati aɛ̀ ai uusie. Àpi kɔ̀n Isaraili gbɛ̀nsinɔ̀ bùsu kùku ń mìa. 7 Ben Yosua bè: Á'a, Dii Luda! À kè dia n wa bikū Yodaa n wa na Amɔ̀rinɔ̀ne ń ɔ̀zɪ̀ aɔ̀ wa kaateɛ̀? Tó wá vɛ̀ena Yoda baa káa kpa yá né! 8 N yá nna Dii! Zaake Isarailinɔ̀ b̀ru kpee ń ibɛ̀nɔ̀ne, mé be dia saa? 9 Kanaanɔ̀ kɔ̀n bùsu kè deenɔ̀ é yá pì ma ń píngi, aɔ̀ ligawazi aɔ̀ wa kaate andunan. N tó bítakeɛ̀ sɔ̀ né? Né keo diame? 10 Ben Dii bè Yosuanɛ̀: N fɛ̀ n zɛ̀! À kè dia ń daena n puua? 11 Isarailinɔ̀ durun kè, aɔ̀ ma bà kuunańyo yá gb̀ro. Aɔ̀ tɛ̀ pɔ̀ kenɔ̀ sɛ̀, aɔ̀ kpāi ò, aɔ̀ mɔ̀nafiki kè, aɔ̀ pɔ̀ pì dà ń pɔ̀nɔ̀ guu. 12 Beee yānzi aɔ̀e fɔ̀ wà ń ibɛ̀nɔ̀ gá firo. Aɔ̀ b̀ru kpeeńne, kè aɔ̀ gò kaatena pɔ̀ ũ yānzi. Mɛ̀gɔ̀ kúao dɔ̀ro, séto a tɛ̀ pɔ̀ kè kú a ténɔ̀ kàate. 13 N fɛ̀ n gá gbāsɪ̀ bɔ̀ n gbɛ̀nɔ̀n. N beńne aɔ̀ gbāsɪ̀ bɔ̀ ń zɪ̀ndan ai guu gɔ̀ gá dɔ̀, zaake mamɔ̀ma Dii Isarailinɔ̀ Luda ma bè, tɛ̀ pɔ̀ kú a tɛ̀me. É fɔ̀ à zɛ̀ a ibɛ̀nɔ̀ aɛ̀ro séto à

pó pí b̀ò a té. ¹⁴ Tó guu d̀ò, à s̀òmazi bori k̀òn boriio. Bori k̀è má s̀è é s̀òmazi danɛdanɛ, danɛ k̀è má s̀ènɔ é s̀òmazi ualɛ k̀òn ualɛo, ualɛ k̀è má s̀è s̀ò, à g̀ògbɛ̀nɔ é s̀òmazi doodo. ¹⁵ Gb̀è k̀è wà gà wà t̀è pí pí èa, weé adee kpata k̀òn pí k̀è à v̀iino píngi, zaakɛ à ma bà kuunaaoyá gb̀òromɛ, à wí dà Isarailinɔa.

¹⁶ Yousua f̀èe k̀ongɔ ide'ide, à tò Isarailinɔ s̀ò Diizi bori k̀òn boriio, ben gb̀è Yuda bori s̀è. ¹⁷ Ben à tò Yudanɔ s̀òzi danɛdanɛ, ben gb̀è Zera danɛnɔ s̀è. À tò Zera danɛnɔ s̀òzi ualɛ k̀òn ualɛo, ben gb̀è Zimiri ua s̀è. ¹⁸ Ben à tò à ua g̀ògbɛ̀nɔ s̀òzi doodo, ben gb̀è Kaami né Aká, Zimiri dío, Zera swákpɛɛ, Yuda bori s̀è. ¹⁹ Ben Yousua bè Akáɛ: Né, ñ yápuraa o ñ bèe lí Dii Isarailinɔ Ludanɛ. Ñ yá k̀è ñ k̀è omɛ. Ñton à ke utɛmɛro. ²⁰ Ben Aká wèàla à bè: Yápuramɛ, ma durun k̀è Dii Isarailinɔ Ludanɛ. Yá k̀è má k̀èn yè. ²¹ Ma Babilɔnia gumusu maaa è ñ p̀ónɔ té k̀òn kondogio kiloo plaa k̀òn vura kiloo kusuo, ben à nii g̀èmagu má s̀è. À utena wèen ma kpén, kondogi kú g̀ízi. ²² Ben Yousua gb̀ènɔ z̀ì gwe. Aó k̀è kpaa aó gàa wà g̀è à kpén, ben aó è utena gwe, kondogi kú g̀ízi. ²³ Ben aó s̀èe wà m̀òo Yousuanɛ k̀òn Isarailinɔ ñ píngi, aó kàe Dii aɛ. ²⁴ Ben Yousua k̀òn Isarailinɔ Zera swákpɛɛ Aká s̀è k̀òn kondogi píò k̀òn gumusu píò k̀òn vura píò k̀òn à nég̀ògbɛ̀nɔ k̀òn à nénɔgbɛ̀nɔ k̀òn à z̀ùnɔ k̀òn à zaakinɔ k̀òn à s̀aanɔ k̀òn à bisakutaaoyá k̀òn à p̀ónɔ píngi, aó g̀aányo Akoo guzuren. ²⁵ Ben Yousua bè: N yá g̀àewe fá! Dii é yá m̀ónne gb̀àa s̀ò. Ben Isarailinɔ à pàpa gb̀èo ñ píngi, aó à d̀è k̀òn à gb̀ènɔ ñ píngi, ben aó ñ kpáta. ²⁶ Aó gb̀è kàkaàla, gb̀èdidik̀òana bíta pí kú gwe ai k̀òn a gb̀àao. Ben

Dii pɔfɛ kpàe. Beee yānzin wè be guu pìne Akoo guzurɛ.

8

Ai kaatena

¹ Dii bè Yosuanɛ: N̄ton tó vĩa n kũro. N̄ton bídi kerɔ. N̄ zìkpɛɛnɔ sée n̄ gányo n̄ píngi, à lée Aia, zaake ma Ai kína n̄anne n̄ ɔzĩ k̄n̄ à gb̄ɛnɔ k̄n̄ à wéteɔ k̄n̄ à bùsuo. ² N̄ ke Ai k̄n̄ a kínaone lán n̄ kè Yeriiko k̄n̄ a kínaone nà, m̄de é f̄s̄ à n̄ pónɔ k̄n̄ n̄ pókãdeeno sée a pó ũ sa. N̄ naeíne n̄ wéte kpɛɛ. ³ Ben Yosua k̄n̄ a zìkpɛɛnɔ gàa wà lée Aia n̄ píngi. À ḡs̄agbãaanɔ sè ḡs̄on b̄ɔɔ baaakuri, ben à n̄ gbáe gwãavĩ ⁴ à bèíne: À swã kpá! À naeíne n̄ wéte kpɛɛ. Àton ke zã wéte pìoro. Àḡ kú soru guu a píngi. ⁵ Mapi k̄n̄ gb̄ɛ kè āɔ kúmaonɔ wé s̄s̄ wéte pìzi. Tó ās̄ b̄ò dawale, wéḡɔ bàa léíne lán káaku bà. ⁶ Ās̄é péwa ai ās̄é k̄é n̄ wétea zã, zaake ās̄éḡɔ daa wée bàa leéíne lán káaku bàme. Tó wée bàa leéíne le, ⁷ à f̄e a utekiia à wéte pì sí. Dii a Ludaa nàare a ɔzĩme. ⁸ Tó a wéte pì sì, à té s̄s̄a lán Dii ò nà. À làakari ke, à ke lán má òiare nà.

⁹ Ben Yosua n̄ gbáe, ās̄ gàa guu kè ās̄é e wà n̄ zãmba ken. Ās̄ nàe Beteli k̄n̄ Aio dagura Ai ɔf̄ant̄ḡɛkp̄en kpa. Gwãavĩ beee a Yosua ì bùran gwe k̄n̄ a gb̄ɛnɔ. ¹⁰ À f̄e k̄onḡo id̄e'id̄e à gb̄ɛnɔ kàk̄s̄a, ben à p̄i k̄n̄ Isaraili gb̄ɛnsinɔ d̄ón̄ne āe ai ās̄ gàa káo Ai. ¹¹ Zìkpɛɛ kè ās̄ kúonɔ s̄s̄ wéte pìzi n̄ píngi. Kè ās̄ kào k̄ĩ, ās̄ bùra kàe à āe gu'igb̄aroo kpa. Guzurɛ kú n̄ dagura k̄n̄ Aio. ¹² Yosua gb̄ɛnɔ sè b̄ɔɔ s̄ɔɔro. À ḡĩake à n̄ úte Beteli k̄n̄ Aio dagura kò Ai ɔf̄ant̄ḡɛkp̄en kpa. ¹³ Isarailinɔ bùra kàe wéte

gu'igbāroo kpa, bensõ gbẽ kè aõ naena pìnɔ kú wéte ɔfántégèkpen kpa. Gwāavĩ beeea Yosua ì guzurεmme.

14 Kè Ai kína Isarailinɔ è le, àpi kɔn a wétedeenɔ fεe wà kè kpa wà gàañzi kɔn zìo guu kè ae dɔ Araba gbáaa. À dɔ kè gbẽnɔ naena a wéte kpεero. 15 Yosua kɔn Isarailinɔ e kee lán wà be Aideenɔ e n̄ fuu bà, aõe bàa leεnne aõ mì pè gbáaa. 16 Aideenɔ kɔ sisi n̄ píngi aõ bɔe wà pé Yosuanɔa, ben aõ pèmma ai aõ gàa wà kè n̄ wéte zàazã. 17 Gõgbẽ kee e gɔ wéte guuro, aõ bɔe wà pè Isarailinɔa n̄ píngi, ben aõ n̄ wéte bĩile tò wēna, aõe pεε Isarailinɔa.

18 Dii bè Yosuanε: N̄ sári kè n̄ kūna dɔ Aia, zaake má n̄anne n̄ ɔzĩme. Ben Yosua a sári pì dɔ Aia. 19 Kè à ɔ pòro le, ben gbẽ kè aõ naenanɔ fεe wà sì wéten gɔɔ aõ sì, ben aõ kè kpa wà té s̄s̄a. 20 Kè Aideenɔ liε wà n̄ kpεε gwà, ben aõ è tésukpe fεe à dà n̄ wétela, ben aõe gákii e dɔro, zaake Isaraili kè aõ bàa lè wà mì pè gbáaanɔ liε wà ae dɔ n̄ pemmari pìnɔa. 21 Kè Yosua kɔn Isarailinɔ è n̄ gbẽ kè aõ naenanɔ wéte sì bensõ tésukpe fεe à dà wétela, ben aõ èara wà lèe Aidee pìnɔa. 22 Isaraili kpaaanɔ bɔe wéte pìn aõ gàa Aideenɔzi kɔn zìo, ben aõ lìgãñzi. Aõ lèεmma, ben aõ gbẽkee e e à bòro, aõ gbẽkee e e à bàa lèro. 23 Mɔde aõ Ai kína kù b̄εe aõ ḡaao Yosuanε.

24 Isarailinɔ Aideenɔ dède míómíó buraanɔa kɔn s̄etenɔ guu kè aõ n̄ lén. Kè aõ Aideenɔ dède kɔn f̄εedaaɔ le, ben aõ èara wà ḡè wéte pìn, aõ gbẽ kè aõ ḡò gweenɔ dède dɔ. 25 Gbẽ kè aõ ḡaga zĩ pìanɔ ḡõgbẽnɔ kɔn n̄gbẽnɔ n̄ píngi ḡɔn bɔro kuri awεεplaame. Aideenɔ s̄ó lén gwe. 26 Yosua ɔ kè à sári kūnao pì kpé dɔ ai wà gàa wà Aideenɔ dúgu z̄o. 27 Isarailinɔ

wéte pì pókādeeno kōn à póno nàkōa wà tàò lán Dii ò Yosuane nà. ²⁸ Len Yosua té sò Aia le, à tò à gò bezĩ ũ, ben à gò da kori ai kōn a gbàao. ²⁹ Ben à Ai kína lògo lía ai uusie. Kè ɔfántē e gēe kpén, à bè wà à gè bakē lía wà zu wéte bīilea gwe. Ben wà gbè kàkōaa paripari, gbèdidikōana pì kú gwe ai kōn a gbàao.

Dii bà kuuna kōn Isarailino kekēna Ebalakpii musu

³⁰ Yosua Dii Isarailino Luda gbāgbākii bò Ebalakpii musu ³¹ lán Dii zòbleri Musa diē Isarailinone nà. À bò lán Musa kè a doka takada guu nà, à bè wà bo kōn gbè kè wèe gā péea wà àroono. Ben wà sa'opò kè wè ká tén à té kú ò Diia gwe kōn sáabukpana sa'opono. ³² Ben Yosua doka kè Musa kè pì kè gbè pìnoa gwe Isarailino wáa. ³³ Isarailino píngi, bēdeeno kōn bàmōno kōn n̄ gbēnsino kōn n̄ dōn'aēdeeno kōn n̄ yākpækērinō zena àkpati sae ɔplazi kōn ɔzezio. Ā aē d̄ Levi bori sa'ori kè āsēḡō Dii bà kuunaño àkpati senano. Gbē kpadoono aē dōna Gerizimu kpiiia, gbē kpadoono s̄ Ebalakpiiia, lán Dii zòbleri Musa gīake à diē wà sa maaa o Isarailinone nà. ³⁴ Beee gbera Yosua dokayā pino kyó kèné píngi, aubarika kè Dii è daḡuno kōn kè è bōḡuno lán à kú Musa doka takada guu nà. ³⁵ Yā kè Musa dieno té píngi, à kee e ḡō kè Yosua ḡi à kyó ke pariineziro. Baa noḡbēno kōn né féteno kōn bāmō kè āō kú n̄ ténō kú gwe n̄ píngi.

9

Gibiḡdeeno ɔndōkēna Isarailinozi

¹ Borii kè āō kú Yoda ɔfántēgēkpen kpaano, s̄is̄ideeno kōn gusararadeeno kōn ísialeadeeno ai

à gaa pé Lebanɔ̀ b̀usua, Itinɔ̀ kɔ̀n Amɔ̀rinɔ̀ kɔ̀n Kanaanɔ̀ kɔ̀n Perizinɔ̀ kɔ̀n Ivinɔ̀ kɔ̀n Yebusinɔ̀, k̀è aɔ̀ ḱinanɔ̀ Ai yã̀ p̀ì baaru mà, ² ben aɔ̀ k̀s k̀àk̀sá ń p̀ingi l̀e wà gá wà z̀ì ká kɔ̀n Yɔ̀suaɔ̀ kɔ̀n à gb̃e Isarailinɔ̀.

³ K̀è Gibiɔ̀deenɔ̀ yã̀ k̀è Yɔ̀sua k̀è Ỳerikonɔ̀ kɔ̀n Aio baaru mà, ⁴ aɔ̀ ɔ̀ndɔ̀ d̀aɛ́nzi. Aɔ̀ k̀s̃aɛ̀ k̀àka s̀àki zikúnanɔ̀ guu aɔ̀ didi zaakinɔ̀nɛ kɔ̀n geepiw̃è t̀uu zi parana nabinabinanɔ̀. ⁵ Aɔ̀ kyate nambata nanananɔ̀ kpákpana, aɔ̀ p̀sia utanɔ̀ dadana. Aɔ̀ bur̃edi k̀s̃aɛ̀ gagana bens̃ɔ̀ à p̀ù kpà.

⁶ Aɔ̀ f̀e wà gaa wà Yɔ̀sua l̀è kɔ̀n a gb̃enɔ̀ Giligala b̀uran, ben aɔ̀ b̀èr̃nɛ: B̀usu k̀è wa b̀on z̀à. Wá yezi à l̀edolɛ̀ k̀ewao. ⁷ Ben Isarailinɔ̀ b̀è Ivi p̀inɔ̀nɛ: Tó a b̀e kú k̀è k̀imɛ, wé l̀edolɛ̀ k̀eaoro yooo! ⁸ Ben aɔ̀ b̀è Yɔ̀suanɛ: N z̀òblerinɔ̀n wa ù. Ben Yɔ̀sua ń lá à b̀è: D̀enɔ̀n a ùu? A b̀o máme? ⁹ Aɔ̀ wèàla wà b̀è: Wamɔ̀wa n z̀òblerinɔ̀, wa b̀o b̀usu z̀aazammɛ Dii n Luda tó k̀è d̀agula yã̀nzi. Wa à baaru mà kɔ̀n yã̀ k̀è à k̀è Igipitinɔ̀ p̀ingi ¹⁰ kɔ̀n yã̀ k̀è à k̀è Amɔ̀rinɔ̀ ḱina g̃ɔ̀n plaa k̀è aɔ̀ kú Yoda baa k̀aa kpaanɔ̀nɛ, Eseb̃ó ḱí Siɔ̀ kɔ̀n Basá ḱí Ogu k̀è kú Asataroo. ¹¹ Wa gb̃ensinɔ̀ kɔ̀n wa b̀usudeenɔ̀ b̀è wà k̀s̃aɛ̀ sé wà ḿ wà a le, wà beare a z̀òblerinɔ̀n wa ù. Beee yã̀nzi à l̀edolɛ̀ k̀ewao. ¹² Wa k̀s̃aɛ̀n ỳè. Wa b̀oo b̀e bur̃edi w̃aaa ùmɛ gur̃ɔ̀ k̀è wa da z̀én wée m̃ɔ̀ a kiia. À gwa dian à kori k̀ù nà à p̀ù kpà. ¹³ Wa geepiw̃è t̀uunɔ̀n ỳè. Wa geepiw̃è k̀àn t̀uu dufu ùmɛ. À gwa dian aɔ̀ p̀arapara nà. À wa utanɔ̀ kɔ̀n wa kyateenɔ̀ gwa. Aɔ̀ ỳakayaka tá gb̃aa k̀è wá ò yã̀nzi. ¹⁴ Ben Isarailinɔ̀ ń k̀s̃aɛ̀ bl̀ènyo Dii lé saɛ. ¹⁵ Yɔ̀sua l̀edolɛ̀ k̀ènyo à b̀è é ń d̀edero, ben Isaraili d̀on'aɛdeenɔ̀ la dà à yã̀ musu.

¹⁶ Aɔ̀ l̀edolɛ̀k̀enańyo g̀bera à gur̃ɔ̀ aag̃ɔ̀dee z̀ì,

ben aɔɔ mà kè aɔ beɛ zǎńyoro, aɔɔ kú kɔ saeme. ¹⁷ Ben Isarailinɔ dà zén, à guro aagɔdee zĩ aɔ kà ń wétɛnɔ kiia, Gibiɔ kɔn Kefirao kɔn Beroo kɔn Kiriyarimuo. ¹⁸ Aɔɔe léérímaro, zaake aɔ dɔn'aedeeno sińne kɔn Dii ń Luda tóme. Gbɛ píngi e wisɔɔ ń dɔn'aedeenzi, ¹⁹ ben dɔn'aedee pìnɔ bèńne: Wámbe wá sińne kɔn Dii wa Luda tó. Èe kɔ sío kè wà ɔ namma dɔro. ²⁰ Yá kè wé kèńnen yè. Wé ń tó gwe ladana kè wá kèńne yǎnzi, le Dii pɔfɛ tón pita wa musuro. ²¹ Ben aɔ èara wà bè: Wà ń tó, aɔégɔ de wa yàkawerinɔ ũ kɔn wa ítòtòrinɔ. Ben Isarailinɔ zè kɔn ń dɔn'aedeeno yá pìo.

²² Ben Yosua Gibiɔdeenɔ sìsi à bèńne: Bóyǎnzin a egeɛ tòwe lezi? Ase wá kaena kɔ gbálame, ben a bè a kúkii zǎwaoó? ²³ A gɔ kana pó ũ ma Luda kiia sa. Égɔ de à kpé yàkawerinɔ ũ kɔn à ítòtòrinɔ guro píngi. ²⁴ Ben aɔ bène: Wà bè wamɔwa n zɔblerinɔne súusu lán Dii n Ludaa ò a zɔbleri Musane nà. À bè é búsu pì kpáawa píngi à gbɛ kè aɔɔ kúnno kaateare ń píngi. Vía wa kú maamaa wa wèndi yá musu, beee yǎnzi wa kè lezi. ²⁵ Wá kú n ɔzĩme sa. Yá kè kènnɛ maa bensɔ à zé vĩn kewe. ²⁶ Len Yosua kè le à ń bó Isarailinɔ ɔzĩ, aɔɔe ń dɛdɛro. ²⁷ Zĩ beean à ń díe Isarailinɔ yàkawerinɔ kɔn ń ítòtòrinɔ ũ, aɔégɔ yàka wee, aɔégɔ í tɔtɔ Dii gbǎgbákiine guu kè Dii é dien. Ben aɔɔ kuu le ai kɔn a gbǎao.

10

Ɔfǎntɛ zɛna a gbèn

¹ Yerusalemu kí Adonizɛdeki mà kè Yosua Ai sì à kènnɛ dúgudugu, à kè Aine kɔn a kínao lán à kè Yeriko kɔn a kínaone nà. À mà dɔ kè Gibiɔdeenɔ

kō yā mà kōn Isarailinɔ bensō aō kú kō sae. ² Ben vīa Yerusalemudeenɔ kù maamaa, zaake Gibiō né mēwime lán kína wéte ke bà. À bíta de Aila bensō à gōgbēnɔ né zìkari gbāaanɔmē. ³ Ben Yerusalemu kí Adonizēdeki lékpāsā kè Eblonu kí Oamune kōn Yamu kí Piramuo kōn Lakisi kí Yafiao kōn Egelbni kí Debio à bè: ⁴ À mós à dɔmale wà gá léε Gibiōdeenɔa, zaake aō kō yā mà kōn Yosua kōn Isarailinɔ. ⁵ Ben Amōrinɔ kína gōɔn sɔɔroo pìnɔ, Yerusalemu kína kōn Eblonu kínao kōn Yamu kínao kōn Lakisi kínao kōn Egelbni kínao kōn n̄ zìkpēenɔ kō kākōa. Aō gāa wà bùra kàe Gibiō sae, ben aō gāañzi kōn zìo.

⁶ Ben Gibiōdeenɔ gbēnɔ zì Yosuaa Giligala bùran aō bè: N̄ton pā kpá wamɔwa n zòblerinɔziro. N̄ ke kpaa n̄ mós n̄ wa mì sí. N̄ mós n̄ dɔwale, zaake Amōrinɔ kína kè aō kú gusīsīdeenɔ kākōawazi n̄ pínɡi. ⁷ Ben Yosua kōn a gōsagbāaanɔ kōn a zìkpēenɔ b̄de Giligala, aōde mɔɔ n̄ pínɡi. ⁸ Ben Dii bè Yosua: N̄ton vīa keínero. Ma n̄ nánne n̄ ɔzì, aō gbēke é f̄o à n̄ gā f̄iro. ⁹ Bona Giligala Yosua táa ò gwāav̄i ai guu gāa à d̄o à sùmma kāndo zena sai. ¹⁰ Ben Dii tò aō kè ḡiri aō lèkōa Isarailinɔ ae, ben Isarailinɔ l̄er̄mma aō n̄ déde maamaa Gibiō gwe, ben aō p̄er̄mma Betoroni zén d̄o. Aō n̄ déde ai à gāa pé Azeka kōn Makēdaoa. ¹¹ Kè aōde bàa l̄e Isarailinɔne zé kè b̄o Betoroni kè à gāa Azeka guu, Dii loughbe gb̄ent̄e sì n̄ té. Gb̄e kè loughbe p̄i n̄ dédenɔɔ pari de gb̄e kè Isarailinɔ n̄ déde kōn f̄ēdaaonla.

¹² Gurɔ kè Dii Amōri p̄inɔ nà Isarailinɔne n̄ ɔzì, ben Yosua yā ò Diio Isarailinɔ wáa à bè:

N̄ tó ɔf̄ant̄e ze a gb̄en Gibiōla!

Ñ tó mɔɔ zε tεεε Ayalɔni guzurela!

¹³ Ben ɔfǎntē zè a gbèn lε, ben mɔɔ zè dɔ ai Isarailinɔ gàa wà gǔε bò ñ ibεεnɔa. Yǎ pì kú Yasa takadan. Ɔfǎntē gǔ zεna mìdangura, èe gu a gbènlo ai gurɔ do gbǎngbǎn. ¹⁴ Wèe gurɔ beee taka e zikiro, bensɔ wèe e à gberaro. Dii gběntee yǎ mà, zaake èe zì kaa Isarailinɔnemε. ¹⁵ Ben Yosua tà Giligala bùran kɔn a gběno ñ píngi.

Yosua Amɔri kɔnanɔ dedena

¹⁶ Kè kí gɔɔn sɔɔroo pìnɔ bàa lè, wà gàa wà ùte gbèwεen zaa Makeda, ¹⁷ ben wà bè Yosuanε: Wà bò kí gɔɔn sɔɔroo mònɔa gbèwεen zaa Makeda. ¹⁸ Ben Yosua bè: À gbè gběntēno yīpa à tata gbèwεε pìle, à gběno die gwe wàgɔ dǎkpaa. ¹⁹ Àton zero. À péε a ibεεnɔzi à léémma kpεε kpa. Àton tó aɔ ñ wétεno lero, zaake Dii a Luda ñ náare a ɔzīme.

²⁰ Yosua kɔn a gběno ñ déde ai aɔ yezi wà yǎa, aɔ gbě kè aɔ bònɔ kà ñ wéte bīideeno guu. ²¹ Ben Isarailinɔ sù Yosuaa bùran Makeda aafia ñ píngi. Gbēkee e fɔ à yǎke ɔ Isarailinɔ yǎ musu dɔro. ²² Ben Yosua bè: À gbè go gbèwεε pìle à bɔeme kɔn kí gɔɔn sɔɔroo pìnɔ. ²³ Ben aɔ kè le aɔ bènε kɔn kí gɔɔn sɔɔroo pìnɔ, Yerusalemu kína kɔn Eblɔnu kínao kɔn Yamu kínao kɔn Lakisi kínao kɔn Egelɔni kínao. ²⁴ Kè wà ñ bóε lε, ben à Isaraili zìkpεεno sisi ñ píngi à bè ñ dɔn'aedee kè aɔ gàaaonɔnε: À sɔ kīi à gbá zεzε kína kènɔ waaa. Ben aɔ mò wà gbá zèzε ñ waaa. ²⁵ Yosua bènnε: Àton tó vīa a kūro, àton bídi kero. À zε gbāa àgɔ wórɔngɔ vī, zaake len Dii é ke le kɔn a ibεε kè é zì kányonɔ ñ píngi. ²⁶ Beee gbera Yosua ñ déde à ñ

lógó lía, baade kǝn a lío, ben aǝ gǝ logologona gwe ai uusiε. ²⁷ Kǝ ɔfántǝ e gǝε kpén, à bè wà nǝ gǝnɔ bakǝ lí pìnɔa wà nǝ zu gbèwεε kǝ aǝ ùten pìn. Ben wà kǝ lε, wà gbè gbèntǝnɔ tàta wèε pile, à kú gwe ai kǝn a gbàao. ²⁸ Zǝ beeean Yosua Makeda sì. À à kína kǝn à gbǝnɔ dèdε nǝ píngi kǝn fǝεdaao à nǝ káate. Baa gbǝ mèn doo e bɔro. Ben à kǝ Makeda kínane lán à kǝ Yeriko kínane nà.

Yosua zǝblena Amɔrinɔ búsua

²⁹ Yosua kǝn Isarailinɔ bǝε Makeda nǝ píngi, ben aǝ gàa Libina aǝ lèεa. ³⁰ Dii wéte pì kǝn a kínao nàñne nǝ ɔzǝ, ben aǝ nǝ dédε kǝn fǝεdaao nǝ píngi, aǝ gbǝkee e bɔro. Ben aǝ kǝ à kínane lán aǝ kǝ Yeriko kínane nà. ³¹ Ben Yosua kǝn a gbǝnɔ bǝε Libina aǝ gàa Lakisi. Aǝ ligazi aǝ lèεa. ³² Dii Lakisi nàñne nǝ ɔzǝ, à guro plaadee zǝn aǝ sì. Aǝ gbǝ kǝ aǝ kúnno dèdε kǝn fǝεdaao nǝ píngi lán aǝ kǝ Libinane nà. ³³ Kǝ Geza kí Oramu mò à dɔ Lakisideenɔlε, ben Yosua zǝ blèa kǝn à zǝkpεεnɔ, aǝ gbǝkee e bɔro. ³⁴ Aǝ bǝ Lakisi, ben aǝ gàa wà liga Egelɔnizi aǝ lèεa. ³⁵ Aǝ wéte pì sì zǝ beee a gǝɔ, ben aǝ gbǝ kǝ aǝ kúnno dèdε kǝn fǝεdaao aǝ nǝ káate lán aǝ kǝ Laksine nà. ³⁶ Kǝ aǝ bǝε Egelɔni, ben aǝ gàa Eblɔnu aǝ lèεa. ³⁷ Aǝ wéte pì sì aǝ à gbǝnɔ kǝn à kínao dèdε kǝn fǝεdaao kǝn à lakutudeenɔ. Aǝ gbǝ kǝ aǝ kúnno kàate, aǝ gbǝkee e bɔro, lán aǝ kǝ Egelɔnine nà. ³⁸ Ben aǝ gàa Debi aǝ lèεa. ³⁹ Aǝ wéte pì sì kǝn à kínao kǝn à lakutunɔ píngi. Ben aǝ nǝ dédε kǝn fǝεdaao aǝ gbǝ kǝ aǝ kúnno kàate lán aǝ kǝ Eblɔnune nà, aǝ gbǝkee e bɔro. Aǝ kǝ Debine kǝn à kínao lán aǝ kǝ Libinane kǝn à kínao nà.

40 Yousua b̀usu p̀i deeno k̄n à k̄nano d̀ede n̄ p̀ingi, gusĩsĩdeeno k̄n Negevideeno k̄n gusararadeeno k̄n s̄is̄igeēdeeno n̄ p̀ingi. Èe gb̄eke tó b̄eero, à gb̄e k̀e āo kú gweeno k̀ate lán Dii Isarailino Ludaa òne nà. 41 À n̄ d̀ede sena zaa Kadesi Ban̄a ai à gàa pé Gaza, zaa Gos̄e b̀usun p̀ingi ai à gàa pé Gibīa. 42 Yousua z̄i bl̀e k̄ina p̀ino a k̄n n̄ b̀usuno g̀en do ḡo, k̀e Dii Isarailino Ludaa e z̄i kaañne yãzi. 43 Ben à èara k̄n a gb̄eno b̀uran zaa Giligala.

11

Yousua z̄i ble à midena Kanaa b̀usua

1 K̀e Azo kí Yab̄i à baaru mà, à gb̄eno z̄i Mad̄o kí Yobabua k̄n Simir̄onu k̄nao k̄n Akasafa k̄nao 2 k̄n k̄ina k̀e āo kú gu'igb̄aroo kpaano n̄ p̀ingi, k̄ina k̀e āo kú gukpiideeno k̄n s̄etep̄otu k̀e kú Galili sōmete kpaao k̄n gusararaao k̄n D̄oru gusĩsĩdee k̀e kú of̄ant̄eḡekpen kpaao. 3 Ben à èara à gb̄eno z̄i do Kanaa k̀e āo kú of̄ant̄eb̄e kpaano k̄n of̄ant̄eḡekpen kpaano n̄ p̀ingi, Am̄orino k̄n Itino k̄n Perizino k̄n Yebusi k̀e āo kú gukpiideenno k̄n Ivi k̀e āo kú Mizipa b̀usun Em̄oni gb̀e saeno. 4 Āo b̀de k̄n n̄ z̄ikp̄eno n̄ p̀ingi paripari lán ísiale b̀usu'aat̄e bà. Āo s̄ono k̄n n̄ s̄ogoron̄o pari. 5 Ben k̄ina p̀ino k̄o k̀ak̄a āo mò wà b̀ura k̀e led̄o Meromu ín̄o sae, le wà z̄i ká k̄n Isarailino.

6 Ben Dii bè Yousuan̄e: N̄ton v̄ia keñero. Zia m̄ndaa'i mé n̄ na Isarailinōne n̄ ōz̄i āo n̄ d̀ede. N̄ n̄ s̄ono gb̄at̄ikyan̄o z̄o z̄o n̄ n̄ s̄ogoron̄o kpata. 7 Ben Yousua k̄n a z̄ikp̄eno ḡaãzi z̄i k̄ando n̄ p̀ingi āo dànl̄a Meromu ín̄o sae gwe. 8 Dii n̄ náñne n̄ ōz̄i,

ben aã ñ déde aã pè ñ gbēkenɔa ai Sidõ mæwin kõn Misirefo Maimuo kõn Mizipa guzure kè kú ɔfântēbɔe kpaaɔ. Aã ñ déde, aã gbēkee e bɔro. ⁹Yosua kèñne lán Dii òne nà, à ñ sõno gbátikyanɔ zõzõ à ñ sõgoronɔ kpàta.

¹⁰Zi pìà Yosua liara à gàa à Azo sì, ben à à kína dè kõn fēdaao. Azo pìn kína pìnɔ wéte mīdee ũ gurɔ beee. ¹¹Isarailinɔ gbē kè aõ kúnno dède kõn fēdaao aã ñ káate, aã gbēkee e gōro, ben aã té s̄a. ¹²Yosua wéte pìnɔ sì píngi kõn ñ kínano, à ñ déde kõn fēdaao à ñ káate lán Dii zòbleri Musa ò nà. ¹³Mòde Isarailinɔ e té s̄o wéte kè wà èara wà kàe ñ bezi gbènnɔaro, séde Azo kè Yosua té s̄a pì baasiro. ¹⁴Isarailinɔ wéte pìnɔ pónɔ nàkõa ñ p̄ ũ kõn ñ pókādeenɔ aã tào. Aã ñ gbēno dède kõn fēdaao ñ píngi ai aã ñ káate, aõe gbēke tó bēero. ¹⁵Yã kè Dii ò a zòbleri Musane, Musa yã pì ò Yosuanɛ, ben Yosua kè le píngi, èe yã kè Dii ò Musane ke tóro.

¹⁶Len Yosua b̄usu pì sì le píngi, à gukpiide kõn Negevio píngi kõn Gosē b̄usuo píngi kõn gusararaao kõn s̄etepɔtuɔ píngi. À Isaraili gukpiide kõn gusararaao sì ¹⁷sena zaa Alaki gbè kè kú Sei b̄usun ai à gàa pé Baali Gada kè kú Lebanɔ b̄usu guzuren Em̄oni gbè sae. À ñ kínano kùkù ñ píngi à ñ déde. ¹⁸À z̄ikana ḡi kè kõn kína pìnɔ ñ píngi. ¹⁹Ivi kè aõ kú Gibiõnɔ baasiro wéte kee e k̄o yã mà kõn Isarailinɔro, aã ñ blé z̄io píngi. ²⁰Dii bé à tò aã swã gbàgbã, ben aã z̄i kà kõn Isarailinɔ, le Isarailinɔ e wà ñ kaate ñ wēndagwana sai, à yãaño mámmam lán à ò Musane nà.

²¹Gurɔ p̄ian Yosua gàa à Anakinɔ dède gukpiideen kõn Eblɔnuo kõn Debio kõn Anabuo. À ñ

káate à n wétɛnɔ kè dúgudugu Yuda gukpiideen kɔn Isaraili gukpiideeo píngi. ²² Anaki bori kee e gɔ Isarailinɔ busun dɔro, séde Gaza kɔn Gatao kɔn Asadɔdio. ²³ Yosua bɔsu pì sɔ píngi lán Dii ò Musane nàme, ben à kpà Isarailinɔa à kpàatɛtɛ́nne danɛdanɛ túbi ũ. Ben bɔsu pì gò kaena aafia zì sai.

23

Yosua lézana Isarailinɔa

¹ À gurɔplaa kè kè Dii tò Isarailinɔ kámma bò n ibee kè aɔ liganzino yã musu, bensɔ Yosua zi kù kótokoto. ² Ben à Isarailinɔ sɔsi, aɔ gbɛnsino kɔn n mideenɔ kɔn n yãkpaekerino kɔn n don'aedeeno n píngi, à bè́nne: Ma zi kù kótokoto. ³ A wée è yã kè Dii a Ludaa kè bori beeenne a yãzi. Dii a Luda bé à zì kàare. ⁴ Ma borii kè aɔ gò Yoda dagura kɔn ɔfántɛgɛkpen kpa ísia bítaonɔ bɔsu kpàate a boriinne túbi ũ kɔn borii kè ma n káatenɔ pɔo. ⁵ Dii a Luda é ɔ sɔ́nziane eé pɛ́rmaare, é n bɔsunɔ símma le àgɔ vɛ́ lán à à lé gbèare nà. ⁶ À ze gbãa maamaa. À làakari ke àgɔ zì ke yã kè kú Musa doka takada guua. Àton pãne ɔplazi ke ɔzeziro. ⁷ A bà tóngɔ kú kɔn borii kè aɔ gò a té pìnɔoro. Àton n tãanɔ tó sísiro, àton la dańyoro. Àton dɔ́zi à kúeńnero. ⁸ Àgɔ naa Dii a Ludazi ado lán ée kee nà ai kɔn a gbãao. ⁹ Dii ɔ sɔ́are bori bíta gbãadeenɔzi, gbèkee e fɔ à a gá firo ai kɔn a gbãao. ¹⁰ A gbè mèn doo è gɔɔn wàa sɔɔroonɔ fu, kè Dii a Ludaa e zì kaaare lán à à lé gbèare nà yãzi. ¹¹ À làakari ke maamaa àgɔ ye Dii a Ludazi.

12 Tó a kpεε lìnε, ben a na borii kè aã gò a té pìnɔa, tó a n̄nɔgb̄ɛnɔ sè bens̄ɔ a kakɔañyo, 13 àḡɔ d̄ɔ s̄ans̄an kè Dii a Luda é péare borii pìnɔa d̄ɔro. Aḡé ḡɔare takutεε ke mò ũ ke fl̄ànɔ ũ a kpεεgura kes̄ɔ kòkɔnɔ ũ a wéen ai a gaa kaateo bùsu maaa kè Dii a Ludaa kpàawa kèkii guu. 14 À gwa! Ma ka gana anduna pínɡi gákii sa. Á d̄ɔ a n̄s̄en k̄n a laasuuo pínɡi kè sa maaa kè Dii a Ludaa òareenɔ guu, baa mèn doo e ke p̄áro. À p̄apa pínɡi, aã kee e léε p̄áro. 15-16 Lán sa maaa kè Dii a Ludaa òaree p̄apa a musu nà pínɡi, tó a Dii a Luda bà kuunaao yã kè à dìεaree gb̄oro, a gaa a d̄ɔ t̄aanɔzi a kuéñne, Dii é tó sa zaaa kè à ò pìnɔ pínɡi a le ai à gá à a kaateo bùsu maaa kè à kpàawaa kèkiin. Dii é p̄ɔf̄ε pitaawa, é kaate ḡɔo bùsu maaa kè à kpàawaa kèkii pìn.

24

Yousua gb̄enɔ gbana làakari zaa Sekemu

1 Yousua Isaraili boriinɔ kàk̄ɔa Sekemu. À Isaraili gb̄ensinɔ k̄n n̄ m̄ideenɔ k̄n n̄ yãkpaεkerinɔ k̄n n̄ d̄on'aεdeenɔ sisi, ben aã mò wà zè Luda aε. 2 Ben Yousua bèñne: Yã kè Dii Isarailinɔ Ludaa òn yè: A dezinɔ kú Yuflati baa k̄aa kpame yã, aã d̄ɔ t̄aanɔzi. Ibraĩ k̄n Naonɔ de Tera kú n̄ té. 3 Ben ma a dezi káaku Ibraĩ sè zaa Yuflati baa k̄aa kpa, ma ḡεteo Kanaa bùsun pínɡi, ben má tò à borii k̄ò. Ma à gbà Isaaku, 4 ben ma Isaaku gbà Yakubu k̄n Isauo. Ma Isau gbà Sei gusĩĩdee. Yakubu k̄n a n̄enɔ s̄ɔ aã tà Igipiti.

5 Ma Musa k̄n Arunao z̄i, ben ma wée t̄a Igipitinɔa k̄n yã kè má kè n̄ t̄enɔ, ben ma a b̄ɔen. 6 Kè ma a dezinɔ b̄èε Igipiti, kè a ka ísiaazi, ben Igipitinɔ

pèεazi kōn sōgoronɔ kōn sōdeenɔ ai Isia Tēaazi. ⁷ Kè a wii pèmazi, ben ma gusiaa dà a dagura kōn Iyipiti pìnɔ, ben má tò ísíaa dàńla míómíɔ. A wée yā kè má kè Iyipitinɔne è. Beee gbɛra a gurɔplaa kè gbáan.

⁸ Ma mɔao Amɔri kè aɔɔ kú Yoda ɔfántɛbɔe kpaanɔ busun. Kè aɔ fɛεazi zìo, ben ma n náare a ɔzì. Ma n káate, ben aɔ b̀usu g̀ò a ṕó ũ. ⁹ Kè Zipo né Balaki, Mɔabunɔ kína fɛεazi zìo, à Bɛɔ né Balamu sisi à a ká. ¹⁰ Ben ma gi Balamu yā mazi má tò à sa maaa òare, ma a bɔ Balaki ɔzì. ¹¹ Beee gbɛra a bikū Yodaa a ka Yeriko. Ben Yerikodeenɔ zì kàao. Amɔrinɔ kōn Perizinɔ kōn Kanaanɔ kōn Itinɔ kōn Gigasinɔ kōn Ivinɔ kōn Yebusinɔ zì kàao dɔ, ben ma n náare a ɔzì. ¹² Ma zōmantɛnɔ gb̀are a aε, aɔ p̀èare Amɔrinɔ kína g̀ɔn plaaanɔa. Èe ke a f̀εdaa ke a kà bé à p̀èr̀m̀aro. ¹³ Ma tɔɔte kè ámbɛ a à zìi k̀eroo kp̀àawa kōn ẁéte kè ámbɛ á k̀eroonɔ, ben á kú ẁéte p̀inɔ guu. Èe geepi lí kōn kù lí kè ámbɛ á bàronɔ bε blee.

¹⁴ Ben Yosua bè: Àgɔ Dii vīa vī àgɔ dɔɔzi yāpura kōn ǹsɛo do. À tãa kè a dezínɔ d̀ónzi Yuflati baa kãa kpa kōn Iyipitionɔ bɔ a té à dɔ Diizi. ¹⁵ Tó z̀òblena Diine k̀èare zaa, èndɛ à zε kōn tãa kè á yezi à dɔzio gb̀aa, tãa kè a dezínɔ d̀ónzi Yuflati baa kãa kpaanɔn yoo, kesɔ Amɔri kè á kú n b̀usunno ṕó. M̀ode mam̀oma kōn ma b̀edeenɔ, Diin wégɔ dɔɔzi. ¹⁶ Ben gb̀enɔ wèàla wà bè: Gyam! Wé f̀s wà p̀á kp̀a Diizi wà dɔ tãanɔziro. ¹⁷ Dii wa Luda bé à wa bɔ z̀òbleen Iyipiti b̀usun kōn wa denɔo. Ámbɛ à dabuyā bíta pìnɔ kè wa wáa, à wa dākpa wa tãa'ona guu píngi à wa bɔ borii kè wa g̀éte n guunɔ ɔzì n píngi. ¹⁸ Dii bé à p̀èwe Amɔrinɔa kōn borii kè aɔɔ kú b̀usu

kèkiinnɔ. Beee yānzi wégɔ dɔɔ Diizi se, zaake àmbe wa Luda ũ.

19 Ben Yosua bè gbēnɔnɛ: É fɔ à dɔ Diiziro. Zaake à kú adona, Luda nòsegɔaanɔdeemɛ. Eé a taarinɔ kɔn a durunnɔ kēarero. 20 Baa kè à yā maaa kèare yā, tó a pā kpàzi a dɔ bori zítɔnɔ tāanɔzi, eé ɛara à kisia zīawa à a kaate. 21 Ben gbēnɔ bè Yosuanɛ: Lenlo! Diin wégɔ dɔɔzi. 22 Ben Yosua bèhɛnɛ: Ámbe a zīnda sèedadeenɔ ũ, kè a zεo àgɔ dɔɔ Diizi. Ben aɔ bè: Ee! À sèedadeenɔn wa ũ. 23 Ben Yosua bè: Tó lemɛ, à bori zítɔnɔ tāa kè aɔɔ kúaaonɔ bɔ a té à a swè kpá Dii Isarailinɔ Ludaa. 24 Ben gbēnɔ bènɛ: Dii wa Ludan wégɔ dɔɔzi wàgɔ à yā maa.

25 Zī beean Yosua ɛara à Dii bà kuunańyo yā kèkɛ gbēnɔnɛ. Zaa Sekemu gwe à dokayānɔ kɔn yādienanɔ zé kpàéhɛnɛ, 26 ben à yā pìnɔ kè Luda doka takadan. Ben à gbè gbèntɛ sè à pèe gbíí lí gbáru Dii gbāgbākiia gwe. 27 Ben à bè gbēnɔnɛ: À gwa! Gbè kèkii bé eégɔ dɛwe sèedadee ũ. Gbè pì yā kè Dii òwee mà píngi. Eégɔ dɛare sèedadee ũ le àton mɔnafiki kɛ a Ludanero. 28 Yosua gbēnɔ gbàre, ben baade tà a bùsu kè wà kpàa túbi ũu guu.

29 Yā beeanɔ gbera Dii zòbleri Yosua, Nuni né gà. À kè wè basɔro akuri. 30 Wà à v̄i guu kè dɛ à túbi ũu guu Timina Sera, Eflaimunɔ gukpíideen Gaasi kpíi gu'igbāroo kpa. 31 Isarailinɔ dò Diizi Yosua gurɔ píngi kɔn gbēnsi kè aɔɔ kuu à gberaanɔ gurɔɔ dɔ. Gbēnsi pìnɔ wée si yā kè Dii kè Isarailinɔnɛ píngi.

32 Yusufu wánɔ kè Isarailinɔ bò Igipiti sɔ, aɔɔ v̄i Sekemu tɔɔte guu, kè Yakubu lù Sekemu de Amɔ nénɔa kondogi basɔro. Tɔɔte pì kú Yusufunɔ túbi

guumε. ³³ Kè Aruna né Eleaza gà, ben wà à v̄i zaa Gibea, wéte kè wà kpà à né Finεasia túbi ũ Eflaimunc̄o gukpiideen.

Luda yá takada kǝn Bokobaru yáó
The New Testament and portions of the Old Testament
in the Bokobaru language of Nigeria

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

PDF generated using Haiola and XeLaTeX on 11 Nov 2022 from source files dated 9 Oct 2020

c31548a1-5316-53c2-be42-674e0e4c5ae5